

22 OCT 2003

Mahathir-tiba/I

DR MAHATHIR TIBA DI DILI UNTUK LAWATAN TIGA HARI

Oleh: Ahmad Zukiman Zain

DILI, 22 Okt (Bernama) -- Datuk Seri Dr Mahathir Mohamad tiba hari ini untuk lawatan tiga hari bagi memenuhi jemputan rakan sejawatannya dari Timor-Leste, Mari Alkatiri.

Beliau merupakan ketua kerajaan asing pertama membuat lawatan rasmi ke negara ini sejak kemerdekaannya pada Mei 2002.

Alkatiri menyambut ketibaan Perdana Menteri dan isteri, Datin Seri Dr Siti Hasmah Mohamed Ali, di Lapangan Terbang Nicalao Lobato di sini.

Dr Mahathir, yang tiba dari Jogjakarta, diiringi Menteri Luar Datuk Seri Syed Hamid Albar dan Menteri Kerja Raya Datuk Seri S. Samy Vellu.

Menteri Pertahanan Datuk Seri Najib Tun Razak, Menteri Perdagangan Antarabangsa dan Industri, Datuk Seri Rafidah Aziz dan Menteri Perusahaan Utama, Datuk Seri Dr Lim Keng Yaik, tiba lebih awal hari ini dalam satu penerbangan sewa khas dari Kuala Lumpur bersama beberapa pegawai kanan dan 40 ahli perniagaan.

Rombongan turut mengandungi Menteri Besar Perak Datuk Seri Tajol Rosli Ghazali, Ketua Menteri Pulau Pinang Tan Sri Dr Koh Tsu Koon dan Timbalan Menteri Dalam Negeri Datuk Zainal Abidin Zin.

Malam ini, Dr Mahathir akan menghadiri satu jamuan bersama masyarakat Malaysia di Hotel Timor.

Istiadat sambutan rasmi akan diadakan di Istana Kerajaan pagi esok.

Perdana Menteri akan berucap pada sesi parlimen dan kemudian meletakkan batu asas Kompleks Kedutaan Malaysia, sebelum mengunjungi Presiden Timor-Leste, Xanana Gusmao, serta mengadakan dialog dengan ahli-ahli perniagaan di sini.

Pada petangnya, Dr Mahathir dan Alkatiri akan mengetuai delegasi masing-masing pada satu perbincangan serta akan menyaksikan majlis menandatangani perjanjian ekonomi, teknikal, saintifik dan kebudayaan.

Ini akan diikuti dengan upacara penyerahan trak dan peralatan dari Malaysia.

-- BERNAMA

AZZ KHY MAI